

## Governu Dada Proposta OJE 2020 Husi PN



Primeiru-Ministru apresenta programa Governu no orsamentu iha Parlamentu Nasionál. Imajen Tatoli/ Egas Cristóvão

**DILI, 03 dezembru 2019 (TATOLI)**—Oitavu Governu Konstitusionál lideradu Primeiru-Ministru, Taur Matan Ruak, dada ona proposta orsamentu jerál Estadu (OJE) 2020 husi Parlamentu Nasionál (PN).

“Governu pondera no aseita retira fali orsamentu jerál Estadu no promete katak iha tempu badak sei ajusta hotu-hotu hodi akomoda preokupasaun deputadu sira-nian hotu hodi apresenta filafali iha diskusaun oin mai”, Primeiru-Ministru, Taur Matan Ruak, ko’alia hafoin deputadu sira husu dada proposta ne’e tanba la estrutura no kontra Lei Jestaun Finanseira, iha plenária Parlamentu Nasionál, tersa ne’e.

Xefe Governu agradese ba deputadu sira nune’e hadi’a di’ak liután proposta orsamentu ida-ne’e.

Primeiru-Ministru konsidera preokupasaun deputadu sira-nian lejítimu, tanba ne’e Governu simu no rejista. “Obrigadu barak ba kobtribuisaun sira hotu”, Taur dehan.

**Jornalista: Evaristo Soares Martins    Editór: Xisto Freitas**

## **Governu Kompromete Submete Fali Proposta OJE 2020 Ba PN Iha 13 Dezemburu**

**DILI, 03 dezemburu 2019 (TATOLI)** – Hafoin Oitavu Governu Konstitusionál deside pondera (dada hikas) proposta Orsamentu Jerál Estadu (OJE) 2020, Primeiru-Ministru Taur Matan Ruak promote prezenta hikas fali iha 13 dezemburu tinan ne'e.

“Ami sei hatama filafali proposta lei OJE 2020 iha *dia 13 dezembro*, signifika katak *dia 23* ita bele konklui, más se ita iha tempu 13 *dias* atu diskusaun jeneralidade no espezialidade, más ami só bele hatama iha 13 dezemburu”, Xefe Ezekutivu afirma iha plenária Parlamentu Nasionál, ohin.

Prezidente Bankada FRETILIN, Aniceto Guterres, hatete Primeiru-Ministru deside ona atu dada proposta lei OJE 2020, más presiza iha data fiksi ida atu Estadu ne'e bele iha finanseiru hodi finansia mákina.

“Agora, ita iha dezemburu sei to'o 1 janeiru seidak iha orsamentu, ita tama ba orsamentu duodésimu”, katak.

Deputadu Aniceto friza presiza duni iha serteza atu labele mosu fali esperiénsia tinan balu bá kotuk ne'ebé Estadu la'o ho laiha orsamentu.

Deputadu Bankada PD, Adriano do Nascimento, husu ba Governu no Bankada Governu iha Parlamentu Nasionál atu deside hamutuk hodi lori proposta lei foun OJE 2020 mai labele kontradisaun fali.

“Ami husu ba Bankada Governu atu deside hamutuk ho Governu hodi labele mai iha plenária mak dehan inkonstitusionál fali halo ami no povu konfuzau”, sujere.

Deputada Bankada CNRT, Carmelita Moniz, sujere mós ba Governu bele prezenta iha 13 dezemburu no diskusaun no aprovasaun bele halo iha janeiru 2020.

“La problema kuandu ita diskute fali iha janeiru 2020 tanba se la sala ita-nia konta tezouru iha to'o janeiru”, afirma.

Nia dehan Bankada AMP tane interese Estadu mak hateten sai buat ne'ebé la loos atu hadi'a hodi dezentolve nasaun.

Deputadu Bankada PLP, Abel Pires, agradese ba Governu liuliu Primeiru-Ministru tanba tane interese nasional no Estadu hodi ho laran luak dada hikas fali proposta OJE 2020.

“Kalendáriu ne'ebé Primeiru-Ministru hato'o ne'e razoavel atu ita diskute no aprova molok tama tinan foun (2020)”, katak.

Entretantu, Ministra Finansa Interina, Sara Lobo Freitas, dehan Governu liuhusi Primeiru-Ministru deside ona atu submete fali proposta OJE 2020 iha 13 dezemburu.

Hatán katak sei la fó impaktu ekonomia rai-laran, Ministra Finansa dehan laiha tanba sei prezenta iha 13 dezemburu no bele aprova iha janeiru 2020.

“Ami sei haree kada artigu iha proposta orsamentu ne'e no artigu balun ami sei elimina no balun mantén”.

Kona-ba Prezidente Repúblika iha tempu mós analiza proposta OJE 2020 bainhira Parlamentu Nasionál aprova, Ministra Sara Lobo dehan : “ Tuir lei kuandu orsamentu la aprova to'o fevereiru 2020, iha lei atu Governu uza duodésimu”, afirma.

**Jornalista : Florencio Miranda Ximenes Editora : Maria Auxiliadora**

## Governu Deside Redús OJE 2020 Iha Kategoria Bens No Servisu



Ministra Finansa ein ezersísu, Sara Lobo Brites. Imajen/Tatoli Egas Cristovao.

**DILI, 04 dezembru 2019 (TATOLI)** – Liuhusi reuniaun membru Governu sira ne'ebé prezide hosi Primeiru-Ministru (PM), Taur Matan Ruak, ohin, deside hodi halo redusaun ba proposta Orsamentu Jerál Estadu (OJE) 2020 ho montante biliaun \$1.950, liuliu iha kategoria bens no servisu.

Iha soru-mutu ne'e, Xefe Governu orienta Ministériu Finansa, Ministériu Transporte no Komunikasaun, Ministériu Edukasaun, Juventude no Desportu no Prezidénsia Konsellu Ministru atu haree filafali OJE 2020.

“Enkontru ida ohin ne'e, Ministériu Finansa, Ministériu Transporte no Komunikasaun, Ministériu Edukasaun, Juventude no Desportu no Prezidénsia Konsellu Ministru simu knaar ida hosi Primeiru-Ministru para haree filafali orsamentu”, hateten Ministra Finansa, Sara Lobo Brites, ba jornalista sira iha Palásiu Governu, ohin.

Atuál Vise-Ministra Finansa ne'e dehan, Governu deside ona atu hatún orsamentu, maibé ba montante hira maka seidauk bele fó sai tanba sei diskute hamutuk filafali ho ministériu no instituisaun Estadu hotu.

“Hatún konserteza ona, tanba horiseik hothotu akompaña katak Parlamentu nia rejimentu fó dalan para dada fali orsamentu entaun Governu dada no sei pondera paresér Komisaun C nian, ne'ebé ami sei hatama fali orsamentu ho número ki'ik más ha'u seidauk bele dehan número tanba tenke serbisu hamutuk ho ministériu hothotu”, dehan Sara Lobo.